



ҚАЗАҚСТАН ҰЛТТЫҚ БАНКІ

АҚПАРАТТЫҚ ХАБАРЛАР

2017 жылғы 23 тамыз

Д. Ақышев: «Базалық мөлшерлеменің төмендеуі жылдық инфляция қарқындарының баяулауын көрсетіп отыр»

2017 жылғы шілдеде айлық инфляция соңғы екі жылда ең төмен, яғни инфляциялық таргеттеу және теңгенің еркін өзгермелі айырбастау бағамы режиміне өткен сәттен бастап, – 0,1% болып қалыптасты. Жылдық инфляция 7,1%-ға дейін төмендеді және 6-8% нысаналы дәліздің ортасында тұр. Бұл туралы бүгін ҚР Ұлттық Банкінің Төрағасы Данияр Ақышев Алматы қ. өткен дәстүрлі баспасөз конференциясы барысында хабарлады.



Д. Ақышев халықтың болашақ инфляцияға қатысты күтулері тұрақты деңгейде екендігін атап өтті. «Инфляциялық күтулерді бір жыл бұрын шілдеде 6,4% болған сандық бағалау халық күтулерінің 2018 жылға арналған нысаналы 5-7% дәліз ішінде қалыптасатындығын көрсетіп отыр», – деді ол.

Ұлттық Банк басшысы ағымдағы жылғы 22 тамыздан бастап базалық мөлшерлеменің 10,25%-ға дейін төмендегенін еске салды. «Базалық мөлшерлеменің төмендеуі жылдық инфляция қарқынының баяулауын, инфляциялық күтулердің тұрақты деңгейін, сондай-ақ орта мерзімді кезеңдегі инфляцияны одан әрі төмендету бойынша бағаны көрсетеді. Екінші жағынан, сыртқы жағдайлардың белгісіздігі мен құбылмалылығының өсуі бізді ағымдағы жылы мөлшерлемені одан әрі төмендету бойынша шектейді», – деді Д. Ақышев.

Д. Ақышев теңге бағамының тамыздағы жоғары құбылмалылығын түсіндірді

Тамыздың басында ықтимал құнсыздануы туралы дүрбелең әңгімені әлеуметтік желілерде және БАҚ-та жариялау аясында теңге жоғары құбылмалы болды. Бұл жөнінде ҚР Ұлттық Банкінің Төрағасы Данияр Ақышев бүгін Алматы қаласында өткен баспасөз конференциясында мәлімдеді.

«Теңге бағамының ауытқуын ақтайтын іргелі өзгеріс болған жоқ және тиісінше, бұл серпін қысқа мерзімді сипатта болды. Қазіргі уақытта валюта нарығындағы ахуал толығымен тұрақтанды», – деді Д. Ақышев.

Ол 2017 жылғы 22 тамыздағы жағдай бойынша айырбастау бағамы бір АҚШ доллары үшін 333,08 теңге деңгейінде қалыптасқанын хабарлады. «Теңге бағамының күн сайынғы ауытқулары сыртқы және ішкі күйзелістердің ішкі экономикаға ықпалын шектей отырып, олардың әсерін тез арада сіңіруге мүмкіндік береді», – деп толықтырды Қазақстан Ұлттық Банкінің басшысы.

Ұлттық Банктің АВР бір айда 3 млрд. долларға жуық ұлғайды

Ұлттық Банктің алтынвалюта резервтері шілденің соңында бір айда 10%-ға жуық немесе 3 млрд. АҚШ долларына жуық ұлғая отырып, 32,9 млрд. АҚШ долларына жетті. Бұл жайлы бүгін ҚР Ұлттық Банкінің Төрағасы Данияр Ақышев баспасөз конференциясы шеңберінде журналистерге хабарлады.

Д. Ақышев «Ұлттық қордың активтерін қоса алғанда, елдің халықаралық резервтерінің жалпы сомасы 91 млрд. АҚШ долларына жуық құрағандығы» туралы хабардар етті.

Сондай-ақ Д. Ақышев төлем балансы бойынша деректерді келтірді. «Бірінші жартыжылдықта ағымдағы шоттың тапшылығы, алдын ала бағалау бойынша, 2016 жылғы осындай кезеңмен салыстырғанда 30,5%-ға төмендеп, 2,6 млрд. АҚШ долларын құрады. Оған мұнайдың әлемдік бағасының салыстырмалы түрде өсуі және «Қашаған» кен орнында өндірісті іске қосу оң әсер етті. Бірінші жартыжылдықтың қорытындысы бойынша ағымдағы шот тапшылығының қысқаруы тұтастай алғанда оның 2016 жылғы көрсеткішпен салыстырғанда жыл қорытындысы бойынша төмендеуін болжауға мүмкіндік береді, бұл төлем балансы өлшемдерінің жақсаруын және экономиканың бүгінгі жағдайларға бейімделуін көрсетіп отыр. Қаржы шоты бойынша капиталдың таза әкелінуі алдын ала деректер бойынша 2,6 млрд. АҚШ долларын құрады», – деді Ұлттық Банк Төрағасы. – Тікелей шетелдік инвестициялардың нетто-әкелінуі 4,1 млрд. АҚШ долларына бағаланып отыр, бұл тарихи тұрғыдан ең көп тоқсандық деңгейлердің бірі болып табылады».

Қазақстанда долларсыздандыру процесі күшеюде – Ұлттық Банк

Депозит нарығында валюталық салымдар үлесінің төмендеуі жалғасуда. Бұл туралы бүгін ҚР Ұлттық Банкінің Төрағасы Данияр Ақышев Алматы қ. өткен баспасөз конференциясы барысында хабарлады.

Ұлттық Банктің деректері бойынша, 2017 жылғы шілдеде теңгемен салымдар 0,6%-ға өсті, 2017 жылдың басынан бері 10%-ға өсті, шетел валютасында 3%-дан астам қысқарды, жыл басынан бері 13,7%-ға төмендеді. Нәтижесінде шетел валютасындағы салымдардың үлесі 48,6%-ға дейін төмендеді.

«Депозиттердің ұлттық валютадағы көлемі қатарынан бес ай бойы депозиттердің шетел валютасындағы көлемінен асып кетті. Жеке тұлғалар салымдарының құрылымында

шетел валютасындағы депозиттер үлесі 54,8%-ға дейін, заңды тұлғалардікі 43,4%-ға дейін төмендеді», – деді Д. Ақышев.

Қазақстанда кредиттеу нарығы біртіндеп қалпына келуде – Д. Ақышев

2017 жылғы қаңтар-шілдеде жаңадан берілген кредиттердің көлемі 2016 жылғы ұқсас кезеңмен салыстырғанда 5,2%-ға ұлғайды. Бұл деректерді бүгін журналистерге баспасөз-конференциясы шеңберінде ҚР Ұлттық Банкінің Төрағасы Данияр Ақышев келтірді.

Оның айтуынша, «өсу ұлттық валютадағы кредиттердің 24,8%-ға немесе 1 трлн. теңгеге жуық ұлғаюына және валютада берілген кредиттер көлемінің жартысынан астам 52,5%-ға төмендеуіне байланысты орын алды». Нәтижесінде 2017 жылғы шілденің соңында экономикаға берілген кредиттердің жалпы көлемі жыл басынан бастап 0,7%-ға ұлғайып, 12,8 трлн. теңгені құрады, деп атап өтті Д. Ақышев.

«Ұлттық Банк банктердің кредиттік белсенділігіне талдау жүргізді. Бүкіл кредиттік нарықтың 90%-ы тиесілі 15 банктің ішінен 9 банк жыл басынан бастап кредиттеудің өсімін қамтамасыз етті. Қалған банктер не бизнесті дамытудың үлгісін іздестіруде, не меншікті капиталды ұлғайту үшін ресурстар іздеуде, – деп жалғастырды Д. Ақышев. – Банк секторының қаржылық тұрақтылығын қамтамасыз ету және экономиканың нақты секторын кредиттеуді қалпына келтіру мақсатында Ұлттық Банктің Қазақстан Республикасы банк секторының қаржылық орнықтылығын арттыру бағдарламасын қабылдағаны белгілі».

Бағдарлама банктерді капиталдандыруды қолдауға бағытталған, олардың қаржылық тұрақтылығын және ықтимал жаңа жағымсыз сыртқы факторларға төзімділігін күшейтеді. Бұл ретте бағдарлама акционерлер мен инвесторлардың банкті капиталдандыру жөніндегі ортақ жауапкершілігі қағидатымен іске асырылатын болады деп толықтырды ҚРҰБ басшысы.

«Банк секторын қолдау бойынша қабылданатын шаралар банк секторының жұмыс істемейтін активтерінің қысқаруына, нақты секторды кредиттеуді жандандыруға әкеледі және тұтастай алғанда ел экономикасының дамуына мультипликативті әсер етеді деп санаймыз», – деп қорытындылады Д. Ақышев.

Ұлттық Банк экономиканың нақты секторының кәсіпорындары мониторингінің нәтижелеріне түсінік берді

Экономиканың нақты секторында оң үрдістер байқалуда, бұл туралы 2017 жылғы 2-тоқсанда жүргізілген кәсіпорындар мониторингінің нәтижелері куәландырады. Бұл туралы бүгін ҚР Ұлттық Банкінің Төрағасы Данияр Ақышев Алматы қаласында өткен баспасөз конференциясы барысында хабарлады.

Оның айтуынша, тұтастай алғанда нақты сектор бойынша дайын өнімге сұраныс өсу аймағында, дайын өнімге бағаның өсу қарқыны баяулады. «Кәсіпорындардың күтулері бойынша, 3-тоқсанда дайын өнімге сұраныс жедел өседі, дайын өнімнің, сондай-ақ шикізат пен материалдардың бағасы баяу өседі, – деді Д. Ақышев. – Мониторингке қатысушылардың инвестициялық белсенділігіне назар аударғым келеді. 2017 жылғы 2-тоқсанда инвестицияларды қаржыландырмаған кәсіпорындардың үлесі азайды. Осы мақсатта меншікті қаражаты мен банктердің кредиттерін пайдаланған кәсіпорындардың үлесі өсті».

Бұл ретте, Д. Ақышеви атап өткендей, тарихи тұрғыдан банктердің кредиттері бойынша берешегі бар кәсіпорындардың үлесі көп өзгермейді. Мәселен, 2003 жылдан

бастап кредиттік берешегі бар кәсіпорындардың үлесі (мониторингке қатысушы кәсіпорындардың жалпы санынан) шамамен 40%, ағымдағы жылдың екінші тоқсанының қорытындылары бойынша 39% болды. «2006-2008 жылдары аталған үлес 45%-ға жетті, бұл айтарлықтай өзгеріс әкелмейді – кредит кәсіпорындар қызметін қаржыландырудың негізгі көзі бола алмайды. Бұл ресми статистикамен расталады. Негізгі капиталға инвестициялардың көп бөлігі кәсіпорындардың меншікті қаражаты есебінен – орташа алғанда 2005 жылдан бастап кезең ішінде 50%-дан астам мөлшерде өтеледі», – деп жалғастырды Д. Ақышев. Оның айтуынша, ерекше жағдай 2009 жылы орын алды, ол кезде ұйымдардың меншікті қаражаты есебінен инвестициялау үлесі 33%-ға дейін, негізінен тау-кен өндіру секторына және көлікке шетелдік инвестициялардың қаражаты есебінен қысқарды. «2017 жылғы қаңтар-шілдеде негізгі капиталға инвестицияларға меншікті қаражат үлесі 70%-ға жуық болды», – деп қорытындылады Д. Ақышев.



Толығырақ ақпаратты мына телефон бойынша алуға болады:

+7 (727) 2704 585

e-mail: press@nationalbank.kz

www.nationalbank.kz